



ATASSUT

UPA14/171

Knud Kristiansen

04.06.2014

Nunatsinni qanoq iliorluta, inoqarfiit annerit illoqarfiillu minnerit avinngarusimasullu eqqarsaatigalugit inuuniarnikkut atugassarititaasut, assersuutigalugu inerisassanik peqqinnartunik pisiassaqarneq, kiassarnermut kallerup inneranut, imermullu akit eqqarsaatigalugit, qanoq nammaqatigiinnerusinnaanerput pillugu apeqquteqaat aallaavigalugu Inatsisartut oqallinnissaannik siunnersuut.

(Inatsisartuni Ilaasortaq Juliane Henningsen, Inuit Ataqatigiit)

ATASSUT-miit oqallisissiamut siunnersuuteqartoq qutsavigaarput.

ATASSUT-mi isorliunerusuni illoqarfiillu minnerni innuttaasut atugaat aallaavigilluinnarlugit politikikkut anguniagaqarnissaq qitiuttipparput. Nunatsinni sumiluunniit najugaqarutta atukkatigut tamatigut periarfissaqartuarnissaq, pisortanit sullinneqarnermi, aammalu kiffartuunneqarnikkut tunngaviusumik sumiiffimmi saaffissaqarnikkut tamatigut periarfissaqassasoq pingaartipparput.

Nunatsinni sumiikkaluaruttaluunniit, tamatta inuiaqatigiit atugarissaarnissatsinnut, sutigullu nunatta ineriartorneranut pilersuinernullu tamanut, nunattalu ingerlanneqarneranut pilersueqataavugut. Tamanna aalisartuugutta, sulisartuugutta, imaluunniit atorfiliugutta naligiimmik naammassisarparput.

Tamatta innuttaasutut aamma tunngaviusumik pisariaqartitat piginnaatitaaffiillu pigivagut.

Taamaattumillu ATASSUT-miit naleqartitatta pingaarnert ilagaat, inuk qitiussasoq.

Pilersueqatigiinnermilu immitsinnut tamatta pisariaqartippugut, sunaluunniit inuussutissarsiut ingerlakkaluarutsigu. Taamaattumik kikkut tamarmik sulinerat atorfissaqartuassaaq. Kikkut tamarmik pilersuinerat pisariaqartuassaaq, tamatta suli pitsaanerusumik atugaqassagutta, sulilu pitsannorsaatissanik kissaateqarutta.

Taamaattumik ATASSUT-ip naalakkersuinermi anguniagaanut naapertuuppoq, siunissaq qanoq iluseqartoq ornikkusunneripput. Meerartavut siunissamik qanoq ittumik atugaqartikkusunnerigut.



Aammalu ilinniartitaanikkut sutigit sinaakkuteqartillugit periarfissikkusunnerigut. Taakku tamarmik ataqatigiipput, pisariaqarlutillu.

Isorliunerusuni inuuniarnikkut atugarisat, pitsaanerusumik aaqqissuutissagaanni, iliuutsit arlallit tunngaviusumik isumaliutigeqqittariaqarput.

Aalisarnikkut siuarsaaneq, nuna ataatsimut isigalugu ilusilersortariaqarpoq. Tamanna pissappat, tunngaviusumik pisassiissutit nalilersoqqittariaqarput. Tunisassiagut naleqarnerulersissagutsigit, avatangiisit iliuuseqarfigisariaqarput. Aalisariutit nutarsartariaqarput, tamannalu nunatsinnut aallaqqaammut nunap karsianut aningaasatigut atuiffiussaaq, tamanna sillimaffigeertariaqarpoq. Kingornami aningaasat utertussatut isigissavagut. Aalisariutinik nutarsaaneq, inerisaaneq, siunissamut “anigaasaliinertut” isigissavarput.

Suliffissatigut pingaartumik nunaqarfinni, ataavartunik pilersitsiniarneq, ataatsimut isigalugu iliuuseqarnek pisariaqarpoq. Illuliortiterneq pineqarpat, imaluunniit sullissinikkut isumaqatigiissutit piusut aaqqissuuteqqinnerisigut periarfissaliinikkut.

Nunaqarfinni namminersortutut inuuneq unammilligassarpassuaqarpoq. Suliassat neqeroornikkut pissarsiarineqarsinnaasut ukioq kaajallallugu annertuneq ajorput. Taamaattorli allatigut aamma saniatigut suliaqarnermik ingerlataqarnikkut oqilisarneqarsinnaavoq. Tamannalu anguniarlugu ATASSUT-miit pingaartipparput, siunnersuineramik suliaqarnek aamma ataavarnerusoq pilersinneqartariaqarmat.

Illoqarfiit mikinerit eqqarsaatigalugit, ATASSUT-miit isumaqarpugut, unammilligassat annertusut, anguneqarsinnaappulli. Pilersaarusionerq, iliuuseqarnerlu ingiaqatigiittumik aaqqissuunneqarpat. Pisortat annertuallaamik kisingajammillu suliffissaqartitsinerat isumaliutigeqqittariaqarpoq. Tassanilu ileqqutoqqat aamma isumaliutigeqqittariaqartut ATASSUT-mi isumaqarpugut.

Misilittakkat pitsaasut, aamma uterfigineqarsinnaapput, suliffissaqartitsineq eqqarsaatigalugu. Aammalu saniatigut ileqqut periutsillu allanngortinnerisigut aamma periarfissat nutaat atuutilissapput.



ATASSUT INATSIARTUNI

Akit assigiit atorunnaarsinneqarnialermata, eqqaamaneqassaaq ATASSUT-mit akkerliussimavugut. Aammalu taamanikkut ATASSUT-mit atukkat kingunissai oqariartuutigisimavugut. Tamannalu eqquuppoq. Ullumikkut atugarineqalersut taamaapput. ATASSUT-miit isumaqarpugut, suli periarfissaqartoq akit assigiit atorunnaarsinneqarnerisa kinguneri nalilersussallugit, aaqqiinerlu naapertuunnerusooq anguneqarsinnaasoq. Tassunga tunngatillugu ATASSUT-mi oqalliseqqinnissamut piareersimavugut.

Illoqarfinni mikinerusuni, pingaartumillu nunaqarfinni, kiffartuussinnermut isumaqatigiissutit, soorlu: KNI A/S-mut Air Greenland-mut allatigullu isumaliutigeqqinnissaat periarfissatut isigaarput. Aamma ATASSUT-miit isumaqarpugut, sammivik suna aallaavigalu isummersorneq apeqqutaajumaartoq. Suliffissaqartitsineq aallaavigalugu, kiffartuussinnermut isumaqatigiissutit nalilersussagutsigit, ATASSUT-miit oqareersinnaavugut, pitsaanagerusinnaavoq, aamma innuttaasunut suliffissaqartitsinerusumik pilersitsiviusumik isumaqatigiissutit aaqqissuunneqarsinnaapput.

Angallanneq imaatigut, silaannakkullu eqqarsaatigalugit kiffartuussinnermut isumaqatigiissutit qimerluussagaanni, eqaallisaaneq annertoq pisariaqarpoq. Soorlu sumiiffiit ilaanni timmisartuaqqamik angallassinerit, upernaakkut, aasaq tamaat, aasallu qaangiunnerani pitsaanagerusumik aaqqissuussisoqarsinnaasoq. Apeqqutit tamakku eqqarsaatigalugit ATASSUT-mit isumaqarpugut, nalilersuinerit pisariaqartut.

Taakku tamarmik isumaliutigeqqinnerini, aammalu allangortiternerisigut, ATASSUT-mit isumaqarpugut, allanut pitsaasumik sunniuteqarsinnaasut, soorlu, niuernikkut, nioqqutissat akii pitsaasumut sunnerneqarsinnaapput, innuttaasunullu sullissineq eqaannerusumik, pissutsinullu naleqqunnerusumik kinguneqartumik.

ATASSUT-miit oqallinnermut qujavugut.